



Gvaqcieng

贵港市覃塘区蒙公镇高占小学六年级 Leiz Gojnz/雷可妮

“Lwgbauq goksag swz bigaeuq, rumzcin raeujrub ci haeuj ranz”, gvaqcieng lo, guek raeuz gizgiz cungj angqangq yangzyangz!

Ngoenzdaep gaxgonq, ranzranz cungj baet ranz, ndaw ranz gungx-gungx gokgok cungj baet ndaej seuq-satsat, angqcoux bimoq daeujdaengz. Baet ranz seuq le, daxboh daxmeh couh daiq lwgnyez bae haw cawx buhvaq moq, cawx diengz cawx bingj banh doxgaiq gvaqcieng, gwnz haw vunz caen lai, yawj hwnjbae cungj dwg gyaeuj vunz, mbwn caiq nit, hoengheiq hix bienq raeuj lo!

Ngoenzdaep, ranzranz gaj bit gaj gaeq, bouxmiz lij gaj mou gaj yiengz, ganj guh byaek haemhndaep, ndaw mbanj dauqcawq dwg heiqhom laeuj noh.

Gvaqcieng lij miz aengoj gangj ne! Dingq daxgoeng daxbuz gangj: Doenghbaez, miz doenghduz geizgvaic ndeu heuhguh “duzcieng”, seizcin

caengz daengz, mbouj miz gijmaz gwn, couh daeuj ndaw mbanj haeuj ranz bae caeg gwn, gyoengqvunz lau raixcaix. Hoeng, miz baez ndeu, “duzcieng” youh daeuj caeg gwn lo, dinglingz miz daegmbauq ndeu youq ndaw gyanghongh cuengq lwgbauq, “duzcieng” dingqnyl sing bauq yiengjbungbung, lau ndaej buet deuz-yuyu. Gyoengqvunz lij raen “duzcieng” dwg saekhoengz. Yienghneix, gyoengqvunz gvaqcieng seiz couh cuengq lwgbauq, nem doiq hoengz, nem mbawveh, “duzcieng” caiq hix mbouj gamj haeuj ranz daeuj lo, daihgya couh bingzbingz onjonj, angqvauvau gvaqcieng lo!

Nem doiq dwg cienzdoengj guek raeuz, de dwg aen maqmuengh gyaeundeivunz lai. Ndwencieng cawz-le nem doiq, ndaw ranz lij nem mbawveh, gwnz congchueng nem ceijraed dem.

Haemhndaep, daengx ranz vunz

mbouj hwnj congz ninz, bouxcoz yawj densi lenzvanh vanjvei, bouxlaux byoqfeiz ganggoj, lwgnyez cix angqyangz buet bae buet dauq guhcaemz, caj aeu cienzlokma. Yaek daengz gyanghwnz cibngeih diemj cung, bouxboux cungj cimyawj aencung gwnz ciengz, ndaw bak caez riengz ndaw densi hemq: “Cib, gouj, bet…… sam, ngeih, it, bimoq vaiqlag!” Lwgnyez diuqyatyat, bae coh bouxlaux aeu cienzlokma. Seizneix, ranzranz bakdou dwk bauqreng bauqienva, sing bauq yiengj raq doek raq, vabauq hai rim gwnz mbwn, aenmbwn laepraurau haenx sikhaek ronghsag, couh lumj gyangngoengz ityiengh lo.

Coit couh yienghneix youq ndaw nauhyied yaengyaeng daeujdaengz lo. Vunz ndaw mbanj raen naj cungj naeuz “goengheij”, “goengheij fat-caiz”. Ceiq angq dwg lwgnyez lo, seizbienh gwn gijgwn ndeigwn, doiq bouxlaux gangj sing “goengheij”, couh

ndaej aen hoengzbau ndeu.

Haet co’ ngeih, dou couh bae ranz daxdaiq baiqniengz lo. Ranzdaiq lwgsau lwggwiz vaihseng cungj daeuj lo, nauhyied dangqmaz, gak cungj ndeigwn baij rim daiz.

Ndawcieng mbanjmbanj cungj guh hozdung, lumj bengcag doxdax, dwk lanziuz doxdax, lij miz haujlai canghbueng daeuj ndaw mbanj gai gijgwn caeuq gai vanzgi, gij cienz-lokmaj lwgnyez cungj deng cang haeuj ndaw daeh canghbueng bae lo.

Gvaq ndwencieng cibngux le, aencieng couh gvaq sat lo, gij ndeigwn gwnz daiz, cungj cang ndaw dungx dou bae lo. Gij feihdauh vansubsub haenx gaeuq dou vuenyungz baenz bi lo!

(bouxlauxsae son’ gyauq Cinz Cinhdonz)

(指导老师:覃珍团)



Gvaqcieng Caen Ndei

Cieng daengz lo, cieng daengz lo! Caeux couh muengh cieng daeujdaengz. Bouxgeq bimoq daiq gij angqyangz de daeujdaengz henz ndang raeuz, raeuz naj riu lumj va hai nei.

Gvaqcieng lo, daihgya cungj dawz gij bauqva caeux couh bwh ndei haenx, buet daengz gyanghongh, angqvauvau diemj dawz de, gyaeu lai lo, gwnzmbwn sawqmwh hai ok baenz duj baenz duj va gyaeundeivunz lai. Ndwencieng cawz-le nem doiq, ndaw ranz lij nem mbawveh, gwnz congchueng nem ceijraed dem.

Gvaqcieng lo, gou caeuxcaeux ma daengz ranz daxgoeng daxbuz, soengq hawj gyoengqde coenz vah hohfuk ndeu: “Hoh daxgoeng daxbuz ndwencieng angqyangz, ndangdaej cangq!” Banhaemh gou fat saenqdinj hawj lauxsae: Hoh mwngz ndangdaej cangqndei, saehsaeh swnhsim! Hag-seng mwngz : Luz Yauz. Yienghneix lauxsae hoiz saenqdinj hawj gou sij naeuz: Docih mwngz, hoh mwngz bimoq angqyangz, hagsib cinbu! Gou yawj sat le ndawsim diemzsis.

Gvaqcieng lo, cienzbau gou youh lai le cien maenz ngaenz, caen siengj byotbyangq yungh bak maenz ngaenz ndeu, hoeng youh siengj daengz vah daxbuz: “Daxboh ra cienz mbouj yungzheih, cienz



itdingh yungh youq giz cei youq-gaenj haenx.” Gou couh nyaenx youq lo.

Gvaqcieng lo, gou youh maj-hung bi ndeu lo, ndang maj sang lo, maj naek lo, hix maj le haujlai cihsiz lo, gou hix wnggai engq roxsoq lo.

Bouxgeq bimoq, docih mwngz daiq daeuj faenh angqyangz neix, youq bineix, gou itdingh aeundaiej cingzciik ndei hawj mwngz angq-faengz. Mwngz saenq gou ba! Vih gou gyayouz ba!

(seiq nienzgaep Luz Yauz)

Feih Ndwencieng

Gou gyaez ndwencieng, gyaez gij feih ndwencieng.

Lij caengz daengz ndwencieng, gou couh hainduj siengjniemh gij feih bauqreng lo.

Muengh dwk muengh dwk, ndwencieng dauqdaej daeujdaengz lo. Ranzranz hohhoh cungj cuengq bauqreng. Mwngz yawj!

Daxboh caeuq daxau riu roix bauqreng youq ndaw fwngz diemj dawz, gij sing bauq caen hung ha, saenq ndaej gou goemq rwz hwnj, lau aenrwz deng saenq nuk. Bauqva saeknding saekhenj youq gyangmbwn sinz ok, caen ndei yawj ha! Gou angq ndaej hemqyaya. Gou geizheih dwk cam daxboh, bauqva vihmaz mbouj mbin hwnj mbwn bae ne? Daxboh riu le, lwnh gou, gij bauqva sinz coh seiq mienh bet bai, de dwg dawz moix aen hohfuk soengq daengz cien gya fanh ranz, hawj vunz lai cungj ndangcangq, vuenyungz.

Ndwencieng daeujdaengz, gwnzgai lajmbanj gizgiz cungj nyouq daengz feihhom. Gak cungj gijgwn ndeigwn hawj vunz myaiz rih. Nohgaeq, nohbit, nohmou, faengx, nienzgau…… cungj dwg doxgaiq ndeigwn.

Ndwencieng lij miz haujlai feihhom: Feihhom mbawdoi, feihhom diuzyieng, feihhom buhmoq…… Yienghyiengh cungj iemqhaeuj sim vunz bae.

(sam nienzgaep Wuz Mingz)

